

## Jihad Di Kalangan Rakyat Malaysia Di Luar Negara Perlu Dipantau - Muhyiddin

Bernama

Jun

27,

2014

MUAR, 27 Jun (Bernama) -- Aktiviti jihad membabitkan rakyat Malaysia di luar negara tidak boleh dipandang ringan dan perlu terus dipantau pihak berkuasa bagi memastikan aktiviti keganasan tidak menular di dalam negara, kata Timbalan Perdana Menteri Tan Sri Muhyiddin Yassin.

Beliau berkata aktiviti seumpama itu agak membimbangkan kerana mereka yang terlibat dianggap sebagai pelampau walaupun mungkin tujuan mereka ialah ke arah jihad fisabilillah.

"Mereka ini dilatih dalam bentuk ketenteraan oleh pasukan-pasukan bersenjata, jadi ini sesuatu yang kita harus pantau (dan) walaupun ia berlaku di luar negara, tetapi kemungkinan ada (di dalam negara) kalau mereka pulang ke tanah air.

"Kalau tidak dipantau, inilah kumpulan-kumpulan yang boleh memberi masalah dan mempunyai hubung kait dengan keganasan dan sebagainya," kata beliau kepada pemberita di Kompleks Seri Pekembar, Pagoh di sini hari ini.

Beliau berkata demikian ketika mengulas aktiviti jihad membabitkan rakyat Malaysia di luar negara yang semakin membimbangkan.

Sebagai sebuah negara yang mengamalkan demokrasi, Muhyiddin berkata kerajaan tidak mahu sebarang perkara yang boleh menimbulkan huru-hara.

"Jadi walapun peristiwa itu berlaku di luar negara seperti Syria dan di mana pun, kita tidak boleh pandang ringan, memang pihak kerajaan ada buat pemantauan melalui hubungan kita dengan rakan-rakan pihak berkuasa di peringkat antarabangsa.

"Kita sudahpun terima laporan pihak Kementerian Dalam Negeri menerusi Interpol. Kita sudah dapat maklum balas tentang keadaan yang sebenar tetapi kita belum dapat memastikan secara terperinci," kata beliau.

Dua hari lepas, Ketua Polis Negara Tan Sri Khalid Abu Bakar berkata polis telah mengenal pasti identiti sebahagian daripada 15 individu yang terkorban dalam kegiatan keganasan dan jihad di Syria pertengahan bulan ini.

Bagaimanapun, pihaknya masih menjalankan siasatan bagi mendapatkan butiran tepat sebelum mendedahkan sama ada 15 individu itu adalah rakyat Malaysia atau sebaliknya.

Sebuah laporan akhbar tempatan baru-baru ini mendedahkan terdapat aktiviti merekrut pejuang jihad melalui laman sosial yang turut membabitkan rakyat Malaysia.

Terdahulu, Muhyiddin menyampaikan sumbangan kepada masjid dan surau sempena Ramadan serta hadiah cemerlang peperiksaan Penilaian Menengah Rendah, Sijil Pelajaran Malaysia, Sijil Tinggi Pelajaran Malaysia dan Darjah Khas bagi Parlimen Pagoh.

Sebelum itu, Muhyiddin merasmikan Karnival Rakyat di Kampung Sungai Meda, Bukit Kepong.

Di majlis itu, beliau menyampaikan hadiah kepada pemenang utama Pertandingan Industri Kecil dan Sederhana Pagoh, Aini Ayub dari Multiniaga Frozen Food Sdn Bhd.

Muhyiddin turut menyampaikan bantuan Program Rakan Usahawan Negeri Johor, Sijil Penghargaan Industri Kecil dan Sederhana (IKS) Parlimen Pagoh selain hadiah utama cabutan bertuah sebuah motosikal Modenas 110 yang dimenangi oleh Mohd Syamel Kamarudin dari Kampung Sawah Laku.

Karnival itu menyaksikan pelbagai acara diadakan seperti pameran IKS oleh 24 peserta dari kawasan Parlimen Pagoh dan perlumbaan motorcross.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1049905>